

Noticia
Transparente
di Gobierno

ISLA ONLINE

Diaranson 21 Februari 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



Gabinete Wever-Croes



GOBIERNO DI ARUBA TA PARA BANDA DI STICHTING HUNTO PA PROVEE SOSTEN NA ESNAN CU TIN MESTER DI DJE

"Hunto nos ta den un mision pa crea resiliencia, restora dignidad, y inspira curashi den cada ciudadano cu dreña e portannan di Stichting HUNTO"



Pa Gabinete Wever-Croes, e cuido di salud mental desde un principio tawata tin prioridad den programa di gobernacion. Pa hopi aña tawata tin desafionan grandi tanto pa e profesionalnan cu ta traha den e area di salud mental y adiccion como pa pashentnan. Sinembargo, Gabinete Wever-Croes semper ta reconoce e esfuersonan di tur dia di nos profesionalnan cu ta dedica determinantemente den e cuido di salud mental y adiccion.

Un logro grandi sigur pa mehoracion ta momento cu e Fundacion pa Maneho di Adiccion Aruba (FMAA) y Sociaal Psychiatrische Dienst (SPD) a uni y bira un solo fundacion, Stichting HUNTO. Esaki a haci e trabounan di nos profesionalnan mas eficiente, efectivo y inclusivo na bienestar di e pashentnan.

Diabierna ultimo, 16 di februari, Stichting HUNTO a inaugura su edificio nobo den caya Appeldam den Dakota. Stichting HUNTO tin varios edificio den barionan di Aruba pa lucha contra e problema di salud mental y adiccion na Aruba. E inauguracion di e facilidad nobo na Dakota, tawata un momento tambe pa visualisa speransa, cura y transformacion di ciudadanonan cu ta enfrentando momentonan dificil cu e condicionnan aki ta trece cu n'e.



"Stichting HUNTO ta trece speransa nobo pa nos ciudadanonan cu ta sufrí di condicionnan mental, nan famianan y tambe pa mayornan y famianan di hobennan cu a cay den adiccion", Prome Minister Evelyn Wever-Croes a expresa.

Prome Minister ta gradici Minister Tjon conhuntamente cu su ekipo y demas profesional den e veld, pa traha duro pa bin cu solucion pa e problema serio aki cu tin na Aruba y pa e edificio nobo di Stichting HUNTO na Dakota.

"Danki pa boso determinacion. Mi ta hopi orguyoso di ta lidera un gobierno cu ta pone e proyecto aki como un prioridad y poniendo e ser humano central. Esaki ta inclui salud mental y adiccion cu ta temanan cu mester wordo atendi diariamente. Hunto cu Stichting HUNTO, nos ta logra un futuro mas saludabel y prospero pa cada ciudadano di nos pais.

Gobierno di Aruba ta para banda di Stichting HUNTO, reconociendo e importancia pa provee sosten compasivo na esnan cu tin mester di djé. Hunto nos ta den un mision pa crea resiliencia, restora dignidad, y inspira curashi den cada ciudadano cu dreña e portannan di Stichting HUNTO", Prome Minister a expresa. ■■■

Prome Minister Evelyn Wever-Croes:

ENTREGA DI 20 LAPTOP NA PERSONAL DI DWJZ

E personal ta traha contento y awor tin mas material pa sigui cu e bon trabou



E Departamento di Directie Wetgeving en Juridische Zaken (DWJZ) ta e departamento di legislacion y asuntonan huridico di pais Aruba. E departamento aki ta resorta bou di Ministerio di Asunto General y ta un departamento di gran importancia pa Gobierno di Aruba.

Diamars ultimo, 20 di februari, durante un rato masha ameno, Prome Minister Evelyn Wever-Croes a pasa saluda y combersa cu e personal di DWJZ y a elogia nan riba e bon trabou cu nan ta haciendo. Tambe durante e atardi aki Prome Minister a tuma e oportunidad pa haci entrega di 20 laptop pa asina e personal tin mas y miho material pa sigui eherce e bon trabou. Minister President a indica cu na e departamento aki tin hopi trabou, cu retonan grandi pero ta di destaca cu e personal ta traha contento y esey ta importante.

“Caminda cu nos por trece mas confortabilidad, mas accesibilidad, mas informacion of ayudo manera den e caso aki, ta algo cu semper ta yena nos cu hopi alegria y orguyo. DWJZ manera mi a bisa ta un departamento sumamente crucial, sumamente importante y cada miembro di e personal ta duna su aporte na pais Aruba, ta sirbi e comunidad y esey nos ta hopi gradicido p’e”, Minister President a accentua. ■



Prome Minister Evelyn Wever-Croes:

GOBIERNO DI ARUBA HUNTO CU FUTURA TA INVITA TUR HOBEN ENTRE 14-18 AÑA PA ASISTI NA E STEM X YOUTH SUMMIT DIASABRA AWOR



Diasabra awor, Futura ta organisando un evento unico pa hobennan di 14-18 aña cu ta interesa den Ciencia, Tecnologia, Ingenieria, y Matematica, yama STEM X Youth Summit. Prome Minister Evelyn Wever-Croes a indica cu e conferencia aki di Science, Technology, Engineering, and Mathematics (STEM), lo ofrece e participantenan un dia yena cu actividadnan pa stimula e curiosidad y interes den cada un di nan pa loke ta e diferente topiconan den e mundo di STEM.

Prome Minister a expresa cu e dia aki tambe lo ta un oportunidad pa e hobennan desaroya diferente habilidad importante manera creatividad, colaboracion, pensamiento critico, y nan habilidad pa resolve problema. E industrianan cu ta cay bou e categoria STEM ta esnan cu mas ta creciendo rond di mundo, habriendo portanan den e mercado laboral, pa e hobennan cu ta studia den e ramo aki. P'esey ta hopi importante pa desde awor caba, como gobernantenan di pais Aruba, nos prepara nos hobennan, pa e oportunidadnan laboral den futuro.

E conferencia aki lo cuminsa pa 9:30 am cu un charla di srta Jillian Oduer, cu ta un estudiante di 'Aerospace Engineering' na TU Delft, na unda e lo comparti su experiencia studiando den STEM y e importancia di esaki pa futuro. Despues di e charla importante aki lo sigui diferente workshop interactivo, na unda cada hoben di cualkier nivel por participa, cu e meta pa educa nan mientras nan ta pasa un dia placentero.

Na final di e conferencia, lo tin un expo pa



ilustra diferente organisacionnan cu ta involvi den STEM na Aruba. Tur esnan cu ta interesa di studia of traha den e areanan di STEM, e lo ta un bon oportunidad pa wak ki opcionnan tin disponibel.

STEM X Youth Summit lo tuma luga diasabra dia 24 di February na Hilton Resort for di 9:30 AM pa 4:00 PM. Pa mas informacion y pa registra, bishita stemxaruba.com.

STEM X Youth Summit

A conference dedicated to nurturing the passion for science, technology, engineering, and mathematics (STEM) among Aruban youth

February 24th, 2024

- Ages 14 - 18
- 9.30AM - 4.00PM
- Hilton Resort

Get your tickets at
www.stemxaruba.com

FUTURA

Prome Minister Evelyn Wever-Croes:

OECD A KITA ARUBA FOR DI LISTA SHINISHI

Un bon señal cu confiansa den Aruba ta creciendo



E ‘Organization for Economic Co-operation and Development’ (OECD) ta evalua e sistema legal y financiero di tur pais y si e pais tin practicanan di “belasting paradijs” (paraisonan fiscal) nan ta pone e pais riba ‘Black List’ (Lista Preto). Dos biaha pa aña EU ta publica un resumen di e paraisonan fiscal. Tin paisnan entre otro Rusia y Panama cu ta riba e lista preto y otro paisnan entre otro Bahamas y Belice cu a wordo elimina di e lista aki diamars ultimo. Aruba tawata riba e ‘Grey List’ (Lista Shinishi) y esey por stroba inversionnan den nos pais.

Prome Minister Evelyn Wever-Croes a remarca cu Aruba na prome instante a haya e menasa cu nos lo wordo poni riba e Lista Preto. Sinembargo nan a pone Aruba riba Lista Shinishi pasobra segun nan Aruba no tawata cumpli cu e rekisito di ‘exchange of information’ (intercambio di datonan financiero).

Aruba diamars 20 di februari a ricibi e bon noticia cu EU a dicidi cu Aruba ta cumpli y a kita Aruba di e Lista Shinishi. Aruba ta oficialmente riba e lista blanco. Esaki ta un muestra mas cu e confiansa den Aruba ta creciendo. Corsou di otro banda, si ta wordo considera cu ainda tin

tareanan pa haci por lo tanto ta keda riba Lista Shinishi.

“Nos ta hopi contento y alivia cu e decision aki. No tabata facil pa logra, pero sinceramente nada a bay facil desde cu nos a dreña den Gobierno. Esaki ta resultado di un vision ambicioso y un maneho responsabel. E logro aki ta danki na e esfuersonan y determinacion di henter e ekipo di DIMP y DWJZ y di Minister di Finansa Xiomara Maduro cu ta un dama di caracter pa haci loke ta necesario pa rescata reputacion financiero di nos pais”, Prome Minister Evelyn Wever-Croes a expresa.

Por lesa e articulo completo aki: <https://www.telegraaf.nl/financieel/1226346424/brussel-haalt-aruba-van-grijze-lijst-belastingparadijzen-huiswerk-curaçao>

Overzicht Brussel

Brussel haalt Aruba van 'grijze lijst' belastingparadijzen, huiswerk Curaçao



Door ALEXANDER BAKKER
Aangepast: Gisteren, 15:36 Gisteren, 13:35 in FINANCIEEL



BRUSSEL - Aruba is dinsdag door de Europese Unie van de 'grijze lijst' met belastingparadijzen gehaald. Curaçao staat er nog wel op.





MINISTER

Ursell Arends

GOBIERNO DI ARUBA TA FIRMA COLABORACION PA SALVAGUARDIA E SALIÑANAN PROTEGI



Diaranson 21 di februari durante conferencia di prensa Minister di Naturalesa Sr. Ursell Arends y Minister di Turismo Sr. Dangui Oduber hunto cu Fundacon Parke Nacional Aruba (FPNA) y Wageningen University Research (WUR) a lansa e prome paso pa e proyecto Western Wetlands, financia door di Tourism Product Enhancement Fund (TPEF).

Na 2020, un sistema di cinco saliña importante a ser treci bou e maneho di conservacion activo di Fundacion Parke Nacional Aruba. Esaki tabata consisti di 4 saliña y un otro saliña cu a ser converti den uno permanente cu awa dushi, conoci awe como Bubaliplas. Bubaliplas awe ta forma parti di e planta di tratamiento di awa preto na RWZI Bubali.

Tabata tin un tempo cu e 5 saliñanan aki tabata conecta cu otro, e conexion aki a wordo drasticamente reduci y separa pa motibo di desaroyo humano a traves di construccion di caminda y built environment cual ta e concepto di prepara un area pa actividad humano pa satisface e deseo y necesidad nan di e ciudadanonan.

Pa coregi esaki, na aña 2022, Minister Arends cu apoyo y aprobacion di Consejo di Minister, a instala un grupo di directiva tecnico pa traha un plan cu accionnan corespondiente pa e proyecto di Western Wetlands.

E comision dirigi pa un representante di Ministerio di Naturalesa, huntu cu FPNA, Aruba Birdlife Conservation, DOW, y e arkitecto Antoine Bowers, a ser encarga cu e tarea di traha un plan pa



realisa e proyecto Western Wetlands.

E proposito general di e proyecto Western Wetlands ta pa salvaguardia e saliñanan protegi y e ambiente marino den proximidad, cual lo wordo haci door di bishitantenan prudente, maneho y proteccion di e saliñanan. Protegiendo, conservando y mehorando e integridad, salud y resiliencia di biodiversidad y e ecosistema di e saliñanan. Asina tambe aumentando e balor di Aruba su producto turistico a traves di experiencianan sostenibel di nos naturalesa.

E Western Wetlands lo ser desaroya den tres fase, e prome fase ta e evaluacion basico financia door di TPEF. Minister Arends ta gradici directiva di TPEF y tambe colega minister Oduber pa kere den e proyecto. Palabra di gradicimento tambe ta bai pa Fundacon Parke Nacional Aruba y Universidad di Wageningen pa haci e investigacion aki posibel. ■

CELEBRACION

DIA INTERNACIONAL

PA HENDE MUHE



ACION

TOPICO

**INSPIRA
INCLUSION
DI HENDE MUHE**

FECHA

8 DI MAART, 2024

ORARIO

8:00 AM - 12:00 PM

LUGA

**RENAISSANCE CONVENTION
CENTER**

PA REGISTRA



Gabinete Wever-Croes

Cu e fundeshi di cada
inspiracion propio pa ta inclui,
e hende muhe ta sinti nan mes
empodera, motiva, eleva y importante.
Cada hende muhe cu ta inspira,
ta reconoce oportunidadnan
pa inspira otronan pa ta inclui.



**Minister Maduro na ocasion di bishita di Senadornan Hulandes na
Conseho di Minister di Aruba:**

TA NOS DIFERENCIA TA LOCUAL TA HACI CU E REINO HULANDES TA BAL ORO

Cu un tiki reflexion propio por realisa cu e 'strafrente' pa Aruba no ta su luga




Siman pasa Conseho di Minister a reuni cu un delegacion di Senadornan di Eerste Kamer di Hulanda cu ta forma parti di e comision fiho pa relacionnan den Reino.

Pa e ocasion aki Minister President Evelyn Wever-Croes den nomber di Gobierno di Aruba a duna un presentacion den cual a repasa algun informacion y cifranan cardinal cu ta muestra unda Aruba ta para na e momento aki. Despues di e presentacion, tabata tin oportunidad pa e miembronan di Eerste Kamer haci pregunta y e Ministernan a percura pa brinda contesta amplio pa asina e Senadornan por ta bon informa di tur esfuerzo cu ta wordo haci na bienestar di Aruba.

Na final di e reunion Minister Maduro a haci uzo di e oportunidad pa expresa su opinion riba nos Reino Hulandes, bisando: 'Ik geloof in het Koninkrijk. In onze verschillen schuilt zich de kracht van het Koninkrijk. Alleen moeten we beter met elkaar omgaan, en zelfreflectie is daarbij goud waard. Het Koninkrijk is goud waard.' Cu e expresion aki Minister Maduro kier a pone enfasis riba e importancia pa den Reino Hulandes nos siña conoce y trata otro miho y realisa cu ta nos diferencia ta locual

ta haci e Reino Hulandes uno fuerte. Locual cu falta ainda ta reflexion propio cual ta bal oro, ya cu Reino Hulandes ta bal oro.

E reflexion aki den Reino Hulandes sigur ta importante den e discusionnan cu ainda ta wordo hiba entre Aruba y Hulanda pa pago di e fianza di 915 milyon florin cu Aruba a ricibi di Hulanda como yudansa financiero pa surpasa e pandemia di COVID-19. Riba e suma aki Hulanda ta cobra Aruba un 'strafrente' di 6.9% cu lo costa e Pueblo di Aruba 300 milyon florin, siendo cu Hulanda por y a brinda un interes hopi mas reduci na otro Paisnan den Reino Hulandes. Manera ta conoci, algun miembro di Senado Hulandes tambe ta considera cu e cobranza di e 'strafrente' aki no ta na su luga y pa e motibo aki a bin ta cuestiona esaki fuertemente. Na opinion di Minister Maduro, Aruba su situacion por ta diferente cu e otro Paisnan den Reino Hulandes, pero mester recorda semper cu ta e diferencianan aki ta locual ta haci Reino Hulandes fuerte, y ta nan ta pone cu e Reino Hulandes ta bal oro. Cu un tiki reflexion propio, den Reino Hulandes por realisa cu un 'strafrente' pa Aruba no ta su luga. ■■■





MINISTER DI TURISMO Y ARUBA TOURISM AUTHORITY A RINDI HOMENAHE NA E 6 EX- DIRECTOR/A NAN DI E OFICINA DI TURISMO



Ayera tardi, Minister di Salud Publico sr. Dangui Oduber a presenta na un atardi ameno unda a duna homenaha, celebra y honra e 6 persona excepcionalnan cu a dedica añanan di servicio na promocion y desaroyo di e turismo di Aruba. Nos no por keda sin reflexiona ariba e logronan y metanan bou di e guia di nos director/anan anterior:

- Sr. Michael Kuiperi (1953-1971)
- Sr. Odulio Bertrando "Beti Arends" qepd (1971-1985)
- Sr. Roderick Rory Arends (1985-1989)
- Sr. Remigio Wever (1989-1995)
- Sr. Jan van Nes (1995-2000)
- Sra. Myrna Jansen-Feliciano (2000-2009)

Minister Dangui Oduber ta orguyoso pa e tremendo trabou cu cada un di nan a haci como Director/a di Aruba Tourism Authority (ATA). Durante cada un di nan termino como director/a, nan a sa di demostra e compromiso, pasion y un vision pa cu turismo di Aruba. Ta evidente cu e compromiso y amor cu cada director/a tabata traha cune, ta mescos cu e progreso positivo y sostenibel di nos pais.

Danki na cada un di e personanan aki, Aruba a florece como un destinacion favorito cu a capta e curason di hopi bishitante. E crecimiento remarcabel den cantidad di bishitante, e mehoracion den nos infraestructura turistico, e promocion pa nos pais y nos hendenan cu ta labora den e industria ta demostra cu di berdad nos na Aruba ta biba ariba un "One Happy Island".

Pa finalisa, den nomber di ministerio di Turismo, Minister Dangui Oduber a expresa su profundo aprecio na tur e logronan di: sr. Michael Kuiperi, sr. Odulio Bertrando "Beti Arends" qepd., sr. Rory Arends, sr. Remigio Wever, sr. Jan van Nes y sra. Myrna Jansen-Feliciano pa e bunita trabou den e industria di turismo. Nan vision y dedicacion no solamente a pone Aruba riba mapa mundial, sino tambe a transforma Aruba den un pais unda soñonan ta bira realidad pa e bishitante. Pero tambe unda nos localnan ta sinti nan mes oruyoso di ta biba y orguyoso di promove e "One Happy Island" na mundo hente. A termina e anochi cu un bunita recuerdo, un cuadro, di e pintor Gustave Nouel cu tur ex-director/a ariba dje.



Minister Dangui Oduber:

MINISTER DI TURISMO TA ORGUYOSO DI E APERTURA DI E PLAZA COMERCIO, UN PLAZA NOBO CU TA DESTINA PA REVITALISA E AREA CULTURAL, CULINARIO Y TURISTICO DI ORANJESTAD



Diamars atardi Minister di Turismo y Salud Publico sr. Dangui Oduber tabata presente na e desvelo y nombracion oficial di e plaza nobo pa Oranjestad. Un bunita ceremonia dedica pa revitalisacion y progreso pa Oranjestad den honor di Brenchi Arends y Angel Botta.

Su excelencia, Gobernador J.A. Boekhoudt, tambe tabata presente y colega Minister di Asuntonan Economico, Comunicacion y Desaroyo Sostenibel Sr. Geoffrey Wever a hiba un bunita discurso den e ceremonia oficial cu a tuma lugar ariba e plaza nobo.

Plaza Comercio situa den curason di Oranjestad, ta prepara pa bira un plaza y area culinario unda lo atrea turistanan y localnan pa bin disfruta y conoce e parti vibrante cultural di Oranjestad. Ta pa remarca cu Oranjestad ta bay celebra su



200 aña di existencia y esaki ta demostra cu tin hopi historia di resistencia y inversionnan haci den e ultimo añanan.

E localisacion y diseño di Plaza Comercio ta lo contribui significantemente na e crecimiento economico di e area, promoviendo e restaurantnan existente y alaves atrea mas comercio den area manera tienda nan, boutique, espacionan cultural cu por bira un atraccion turistico y unda nos localnan por disfruta.

Minister Dangui Oduber ta expresa su entusiasmo cu e potencial di e Plaza Comercio pa sigui mehora e producto Aruba y ta gradici Minister Geoffrey Wever y tur persona cu a yuda haci e bunita proyecto aki un realidad. Un proyecto pa recrea y revitalisa nos dushi Oranjestad bek.

Pabien Oranjestad! 🇮🇸



PLAZA COMERCIO TA UN REAFIRMACION DI NOS COMPROMISO PA REVITALISA ORANJESTAD



Diamars ultimo den presencia di S.E. Gobernador Alfonso Boekhoudt, coleganan minister y parlamentarionan, famianan y demas conocidonan di e honradonan, Minister Geoffrey Wever a tene un acto ceremonial unda a desvela oficialmente e plaza nobo na e crusada di Wilhelminastraat y Columbusstraat.

A pesar di enfrenta desafionan infrastructural inespera, a logra finalisa exitosamente Fase 1 di e plan di revitalisacion, cu segun Minister Wever, "ta promete un futuro briyante pa Wilhelminastraat y su area cercano". A indica cu pronto lo inicia cu Fase 2 cu lo expande riba mehoracionnan na iluminacion, parkeo y accesibilidad den e area.

Parti di vision di Minister Wever ta pa revitalisa e centro di ciudad y inyecta bida nobo den e nucleo di Oranjestad. Gobierno tin e rol pa facilita comercio, pa apoya e comerciantenan cu curashi y nan metenan comercial pa asina segura cu nan tin un fundeshi solido pa prospera. "Mester diversifica y enrikece e experiencia di tur cu ta bishita e centro di ciudad", segun e mandatario. Plaza Comercio ta contribui asina na e ambicion pa posiciona Oranjestad como e Capital Culinario di Caribe.

Highlight di e evento tabata e anuncio di "", un concepto innovador destina pa dinamisa e area cu un enfoke riba gastronomia, arte, y musica. Despues di un proceso di nombracion, dos nomber a destaca. Mirando cu tur dos nominado tabata digno di reconocimiento, conseho di minister a bai di acuerdo pa reconoce tur dos persona pa nan aporte na desaroyo di nos centro di ciudad, nombrando e plaza nobo



Plaza Comercio. A brinda un homenahe na e dos personanan aki, esta Sr. Bruno Justiniano "Brenchie" Arends, y Sr. Angel Botta, kende nan contribuicionnan a yuda forma e identidad cultural y comercial di Oranjestad.

Minister Wever a gradici tur esnan cu a contrubui pa por a realisa Fase 1, incluyendo ing. Raffy Kock pa su diseño arkitectonico di e proyecto, como tambe na Sr. Carlos Profet di Inarch, Xena Profet di Profecy Collective, y Metabolic Foundation pa nan contribuicionnan valioso tras di e proyecto.

E inauguracion di Plaza Comercio no ta solamente un logro fisico, pero un simbolo di e aspiracion colectivo pa revitalisa y reimagina e centro di ciudad como un luga di comercio, cultura, y comunidad. "Mi ta convenci cu e inversionan haci lo conduci na mas confiansa y inversion priva den Oranjestad" - Geoffrey Wever.



REUNION CU PRESIDENTE DI GEMEENSCHAPPELIJK HOF VAN JUSTITIE DEN CUADRO DI SIGURIDAD DEN TRAFICO



Siman pasa, Minister di Husticia y Asuntonan Social sr. Rocco Tjon a reuni cu presidente di Gemeenschappelijk Hof van Justitie. Un reunion sumamamente fructifero, caminda a toca diferente topico manera introduccion di e wetboek nobo pa loke ta strafvordering, pero a toca tambe e aspecto di seguridad den trafico.


E aña aki e prioridad pa loke ta husticia ta eleva seguridad den trafico. Pa es motibo, aki e proyecto di "bewaring, opslag en takeldiensten" ta den pleno ehecucion actualmente, pa asina e bira mas facil pa Polis por kita autonan cu no ta cumpli cu rekisitonan for di caminda.

Banda di esaki, dia 1 di maart ta inicia cu e campaña nacional pa loke ta conscientisacion den trafico, y di e forma ey percura pa un trafico mas sigur.

Un otro aspecto ta, crea mas capacidad pa Ministerio Publico por procesa tur "proces verbaal" cu Polis duna y tambe capacidad na corte pa por trata e casonan.

Den cuadro di e ultimo aspecto aki, Ministerio Publico a haya autorisacion caba pa recluta personal especificamente pa esaki.



Di banda di corte a yega na e compromiso pa trata e retraso di alrededor di 300 caso pendiente (2022/2023) pa loke ta core auto bou influencia cu prioridad. Pa un solucion duradero, e aña aki lo introduci un proyecto piloto di "snelrecht" pa asina ora un persona haya un "proces verbaal" e por presenta mesora den corte pa e pasonan necesario wordo tuma. 

Minister Rocco Tjon:

SEGUN E REDACCION 'THE TELEGRAPH'

ARUBA TA E ISLA MAS SIGUR DEN CARIBE PA BIAHERONAN

Recientemente, den un articulo publica pa e redaccion the Telegraph UK, Merca, a emiti un aviso di biahe na biaheronan tocante e seguridad pa bishita e islanan den Caribe esta Jamaica y Bahamas, mirando e estadisticanan di crimen halto na ambos pais. Sinembargo, Aruba a keda nombra como e destinacion di mas 'safe' den Caribe pa biaheronan. Esaki sigur ta algo di aplaudi, y ta grandemente danki na e diferente colaboracionnan cu tin andando den e cadena hudicial y priva.

Manera ta conoci, Merca ta emiti aviso di biahe regularmente pa biaheronan, a base di estadisticanan di crimen y e tipo di crimen cu ta sosode na cada pais. A base di estadisticanan Aruba a sali como e isla di mas sigur den Caribe, y esaki ta debi cu per capita Aruba su cifranan di criminalidad ta hopi mas abou compara cu demas islanan den Caribe.

Den un estudio conduci pa ATA, estadisticanan a demostra cu 98% di bishitante a indica cu un di e motibonan principal pa bishita Aruba ta pa motibo di seguridad. Pues, a base di e cifranan aki, a instala recientemente e ekipo di Tourism Security Patrol Aruba, cual ta consisti di 15 persona cu a sigui varios training riguroso na diferente companianan di seguridad como tambe na Cuerpo Policial mes. Cada un ta ekipa cu material pa traha raport, bodycam, flashlight, electrical bicycle y mas, manteniendo orden publico den areanan turistico riba nos isla.


Banda di esaki, seguridad na nos frontera tambe a avansa y ta sigui avansa, danki na e radarnan cu a wordo instala, pero tambe na e strategisch grensoverleg, caminda diferente departamentonan hudicial ta trahando cu otro pa asina garantiza seguridad na nos frontera.

Por ultimo, mester menciona tambe cu e proyecto di camara di seguridad tambe ta un adicion na e aporte pa loke ta trata seguridad riba nos isla. Asina por bisa cu diferente camara di seguridad a wordo instala na diferente partinan di nos isla, y recientemente tambe den area hotelero. Ademá di esaki, e Operation Command Center, cual ta e departamento cu lo keda encarga cu e monitoreo di e imagennan aki tambe ta den su fase final y muy pronto lo ta operacional.

Palabranan di pabien y elogio na henter nos cadena hudicial, cu ta traha cu cuerpo y alma pa garantiza seguridad pa un y tur.

Most dangerous and safest countries in the Caribbean

			Safety Index (out of 100)
1	Aruba	90	
2	British Virgin Islands	89	
3	Barbados	80	
4	Dominica	80	
5	Grenada	80	
6	Curacao	80	
7	Anguilla	70	
8	Montserrat	70	
9	Saint Kitts and Nevis	70	
10	Saint Lucia	70	
11	Suriname	62	
12	Jamaica	55	
13	Dominican Republic	54	
14	Cayman Islands	50	
15	Bahamas	49	
16	Cuba	47	
17	Trinidad and Tobago	43	
18	Guyana	43	
19	Belize	43	
20	Haiti	42	
21	Puerto Rico	34	



MINISTER ENDY CROES TA FELICITA S.V. RCA CU NAN 90 AÑA DI EXISTENCIA

Danki pa engrandece deporte di futbol di Aruba

Dia 15 di februari, S.V. Racing Club Aruba (RCA) a celebra 90 aña di existencia. Minister Endy Croes a atende e brindis na Club di RCA na Solito. Na 1934, a funda e club bou di e nomber Aruba Beste Club y na 1937 a cambia e nomber pa Racing Club Aruba. E club tin un trayecto hopi largo, impresionante y exitoso den futbol di Aruba. RCA a konkista 34 titulo di campeon den Division di Honor di futbol di Aruba. Un total di 20 biaha RCA a titula subcampeon, pues e ekipo a hunga mas cu 50 biaha e gran final di futbol di Aruba den su 90 aña di existencia.

RCA tin alrededor di 250 mucha activo den e club. Ademá di esaki, RCA tin alrededor di 20 cabayero cu ta forma parti di e team di Division di Honor. Tambe, RCA tin mas o menos 100 miembro. RCA ta activo den 18 division, entre otro, u5, u7, 3 team di u9, 3 team di u11, 3 team di u13, u15, u17, u20, Damas Youth y Open, Division di Honor y veterano. Mester remarca algun logro historico di RCA, entre otro, e prome campeon di Aruba Copa Antiyano, e prome campeon di Pais Aruba na 1986, e prome campeon Liprof, e prome campeon ABS na 2015 y e ekipo cu mas titulo di campeon den Division di Honor di futbol di Aruba.

Durante e ceremonia festivo aki, Minister Endy Croes a hiba palabra y a gradici tur ex presidente, directiva, coach, boluntario y patrocinado pa sostene ekipo di RCA. Tambe, Minister Endy Croes a felicita y gradici e mayornan cu ta duna nan yiu apoyo y sosten pa nan practica nan deporte favorito. Deporte ta e vehiculo cu ta trece hende hunto, crea amistad y ta forma un miho persona pa sociedad.

Minister Endy Croes a enfatisa cu el ta sigui sostene deporte den su totalidad. Den nomber di Gobierno di Aruba, Minister Endy Croes a haci entrega di Reconocemento di Excelencia y a gradici RCA pa engrandece e deporte di futbol na Aruba. E anochi festivo a culmina cu bautismo di uniform nobo di tur division di e prestigioso club.

Pa conclui, Minister Endy Croes ta felicita e ekipo di RCA y ta deseanan hopi exito!





DIA INTERNACIONAL DI IDIOMA MATERNO

Desde aña 2000 tin un dia internacional di idioma materno. Esaki a keda proclama oficialmente pa UNESCO na 1999. Idioma materno ta e idioma cu bo ta siña na cas como mucha; un otro palabra pa idioma materno ta bo prome idioma.

Segun cifranan di censo piloto 2019 (CBS Aruba), Papiamento ta idioma materno di 80% di Aruba su poblacion. E porcentahe aki ta encera tanto esnan cu ta papia Papiamento so na cas, como tambe esnan cu ta papia Papiamento banda di un otro idioma.

Ta calcula cu na henter mundo tin mas o menos 7.000 idioma ta existi. Di e 7 mil idiomanan aki, mas o menos 6.700 ta idiomanan indigeno. Segun estudionan haci, ta premira cu 40% di esakinan tin chens di muri prome cu fin di e siglo aki.

UNESCO ta desea di evita pa idiomanan bay perdi. Idioma ta producto di creatividad di e ser humano. Idioma ta herencia cultural di un pueblo. Diversidad linguistico ta parti di diversidad cultural.

UNESCO ta muestra tambe riba e importancia di siña prome den un idioma cu e alumnonan ta papia of comprende, specialmente den e prome añanan di scol. Despues nan por siña otro idiomanan cu tambe ta importante pa nan mes sigui desaroya, pa desaroyo di nan pais of region y pa e parti internacional. No ta e intencion pa un idioma reemplasa e otro. Di e manera ey ta promove multilingualismo. Door di haya les den su idioma materno, mucha ta siña miho, ta siña lesa y skirbi miho y ta siña otro idioma miho tambe. P'esey e tema di UNESCO di e aña aki ta: Enseñansa multilingual ta un pilar di siñamento intergeneracional.

Na augustus 2024, e alumnonan di Aruba lo cuminsa siña lesa y skirbi na Papiamento den klas 1 di scol basico. Esaki ta idioma materno di 80% y alabes e idioma cu mayoria alumno ta papia of comprende, manera UNESCO ta indica. E idiomanan Hulandes, Ingles y Spaño ta keda idiomanan importante y lo haya nan debido atencion tambe na scol. Entrante augustus e maestronan lo ofrece Hulandes cu un didactica di idioma stranhero. Esey ta encera un otro acercamento compara cu e forma tradicional. Departamento di Enseñansa (DEA) a desaroya un metodo di Hulandes como idioma stranhero,



specialmente dirigi riba nos alumnonan. Alabes DEA ta ofreciendo workshop na e maestronan di klas 1, pa nan ta bon prepara pa e cambionan entrante e aña escolar nobo. Di e forma aki DEA ta contribui na un enseñansa multilingual, dirigi riba e idioma materno di e gran mayoria, preservando Papiamento como herencia cultural di Aruba y preparando e alumnonan pa futuro.

Pa mas informacion por acudi na nos websites www.ea.aw y www.papiamento.aw.

21 di februari 2024

Ban papia Papiamentu

Dia Internacional di Lenga Materno



Papiamento ta nos idioma
Ban papi'e, aprecie y cuid'e.



Minister di Finansa y Cultura

Xiomara Maduro

Minister di Finansa y Cultura

@MinisterXiomaraMaduro



2024

AÑA DI STABILIDAD Y PROSPERIDAD



Gabinete Wever-Croes

Ora nos cana den cayanan di San Nicolas cu ta dorna cu artenan mahestraal aki, nos ta realisa cu bunitesa por wordo haya den luganan menos spera. Arte di muraya ta e language visual cu ta conecta culturanan, na unda cu por aprecia historia, color, fantasia y dedicacion.

